

Acchī Fasal Kā Īnaam

Injeel : Yuhannā 15:1-17

[Īsā^(a.s) ne apne shaagirdoñ ke saath āḳḳhīrī daawat ke waqt unse kahā:]

“Maiñ aṅgur kī bel huñ; aur merā parwardigaar ek maalī hai.⁽¹⁾ Wo phal nā paidā karne waalī har ḍaal ko kaat kar pheñk detā hai, aur wo phal dene waalī ḍaalōñ kī ḥṭāṭāāī aur safāāī kartā hai taaki wo aur zyaadā phal paidā kareñ.⁽²⁾ Tum mere kalaam ko sun kar pahale hī saaf aur paak ho chuke ho.⁽³⁾ Tum merī mohabbat kā daaman nā ḥoḍo aur maiñ tumhaarā saath naheen ḥoḍuṅgā. Koī bhī ḍaal sirf akele phal paidā naheen kar saktī. Us ḍaal ko bel se juḍ kar rahnā paḍtā hai. Isī tarah se tum akele phal naheen paidā kar sakte. Tumko mere saath juḍ kar rahnā hogā.⁽⁴⁾”

“Maiñ ek aṅgur kī bel huñ aur tum uskī ḍaaleñ. Jo mujhse juḍā rahegā, maiñ us se juḍā rahuṅgā aur tabhī wo bahut saare phal paidā kar sakegā. Lekin jo bhī mujhse alag hai, wo kuch bhī naheen kar saktā.⁽⁵⁾ Jo mujhse juḍā huā naheen hai, to wo us sukhī ḍaalī kī tarah hai jisko pheñk diyā gayā ho. Log sukhī ḍaalīyoñ ko jamā kar ke āg me jalā dete haiñ.⁽⁶⁾ Agar tum merī mohabbat kā daaman pakḍe rahoge aur merī baatoñ par amal karoge to tumko har wo cheez atā kī jaaegī jiskī tum ḳḥwaahish rakhte ho aur maaṅgte ho.⁽⁷⁾ Tum zyaadā phal paidā kar ke zaahir karo ki tum mere chaahne waale ho. Tumhaare is amal se aur log bhī hamaare parwardigaar kī hamd-o-sanā kareṅge.⁽⁸⁾”

“Maiñ tumko waise hī pyaar kartā huñ jaise merā parwardigaar mujhse kartā hai. To islie mujhse mohabbat karte raho.⁽⁹⁾ Maine Allaah rabbul kareem ke hukm par amal kar ke apnī mohabbat ko zaahir kiyā. Usī tarah se, tum mere kalaam par amal karo aur apnī mohabbat kā sabut do.⁽¹⁰⁾ Maine tumko ye sab islie bataayā taaki tum merī mohabbat ko apne aṅdar mahasus karo; tum ḳḥushī se bhar jao aur wo baahar tak ḥalake lage.”⁽¹¹⁾

[Īsā^(a.s) ne apne shaagirdoñ se baateñ karnā jaarī rakhā, unhone kahā:]

“Ye merā hukm hai: Ek dusre se us tarah se pyaar karo ki jis tarah se maiñ tumse kartā huñ.⁽¹²⁾ Sabse zyaadā pyaar kā izhaar apne dost ke liye jaan kī qurbaanī hai.⁽¹³⁾ Tum agar merī is baat par amal karoge to maiñ tumko apnā dost kahuṅgā.⁽¹⁴⁾ Maiñ tumko ab apnā ḡulaam naheen kahuṅgā kyuñki ḡulaam naheen jaantā ki uskā maalik kyā kar rahā hai. Maiñ tumko ab apnā dost kahuṅgā kyuñki maine tumko apne parwardigaar ke kalaam ko sunā diyā hai.⁽¹⁵⁾ Tumne mujhe naheen chunā hai balki maine tumko chunā hai. Maine hī tumko phal paidā karne kā kaam diyā hai. Jo phal āḳḳhīr tak raheṅge. To Allaah rabbul kareem tumko har wo nemat atā karegā jo tum mere kaam ke liye maaṅgoge.⁽¹⁶⁾ Ye merā hukm hai ki ek dusre se pyaar karo.”⁽¹⁷⁾